

14 MAY 2003

SULTAN KEDAH, PM HADIRI SANTAPAN DIRAJA

JITRA, 14 Mei (Bernama) -- Sultan Kedah malam ini berangkat menghadiri majlis santapan diraja di Dewan Wawasan di sini bagi meraikan perkahwinan anak lelaki Pegawai Daerah Kubang Pasu, Datuk Ismail Hamid.

Perdana Menteri Datuk Seri Dr Mahathir Mohamad juga menghadiri majlis itu, yang meraikan pasangan Mohamad Ariff Ismail, 28, dan Noordiana Alina Mohd Noor, 27.

Pasangan pengantin itu, yang bertugas sebagai jurutera di Petronas, memulakan acara dengan memotong kek sebelum ke pentas santapan diraja untuk bersama-sama baginda dan Dr Mahathir.

Turut hadir pada majlis itu ialah Menteri Besar Kedah Datuk Seri Syed Razak Syed Zain dan Menteri Besar Perlis Datuk Seri Shahidan Kassim.

Sebelum acara santapan, Sultan Kedah berkenan menghadiri sesi fotografi bersama-sama kedua-dua pengantin dan Dr Mahathir di dalam bilik VIP dewan itu.

Sementara itu, sebelum berangkat pulang ke ibu negara malam ini, Perdana Menteri meluangkan masa kira-kira 30 minit untuk menziarahi anggota jawatankuasa Umno Kubang Pasu, Muhamad Abu Hassan, 51, yang sakit di Taman Sri Kemuning di sini.

Muhamad, yang menghidapi sakit usus, kencing manis, lelah dan darah tinggi, sebelum ini dirawat di hospital.

-- BERNAMA

MNH NAK